

中國方志叢書·華中地方·第九五四號

據

清·陳汝禎等修，匡汝諧等纂
清同治十二年刊本

影印

江西省

廬陵縣志

〔九〕

成文出版社有限公司印行

廬陵縣志卷二十五

名宦志

武勳附

昔文天祥少遊學宮卽慨然曰沒不俎豆其間非夫也名宦從祀於學宮典莫重焉茲茲土者使非實有不朽之勲業可名於百世雖欲倖躋其列顧滋愧矣職無大小要以稱職不失職而可以報國可以慰蒼生之望子養輔翼興利除害宣文奮武得其一端皆足垂諸無窮馨香俎豆廬陵士秀民渙古稱易治後之君子尙其觀法於茲志名宦

名宦

唐

張儼清河人元和間爲廬陵令廉惠通敏彈擊豪黠撫恤細民嘗捐俸掩骼招復流離民有兄弟相訐者儼解諭卒相好如初自

假蒞任連歲大穰皇甫湜稱其恂恂奉上煦煦字民蓋實錄也
從通志訂舊志

宋

王益字舜良臨川人大中祥符進士歷臨江判官領新淦縣改大理丞知廬陵到官除宿姦數人流惡處餘以恩信治之嘗歷歲不咎一人改大常博士出知韶州嶺南習於蠻俗男女無別益首嚴治之未幾男女之行若別塗胡安定採其事入政範官至都官員外郎贈楚國公

通志

舊按王益爲安石之父其墓表曾鞏所撰通志傳所本也爰節錄補入

姜遵字從式淄州長山人舉進士爲蓬萊尉轉開封右軍巡判官辨出抵死疑獄改知廬陵廉正不阿以王曾薦召爲監察御史

遷殿中侍御史遵與知吉州高惠連有隙惠連言遵前在廬陵
受賄請逮治詰遵在對卒無狀猶降通判延州復入爲侍御史
遵長於吏事治尙嚴猛故所莅必震肅天聖中拜樞密副使遷
給事中卒

宋史東
都事畧

陳巽字公順江州德化人大中祥符八年進士及第歷常州團練
推官武安節推用薦改著作佐郎景祐三年出知廬陵民悍多
訟案牘旁午巽隨事摘發剖決如流逾年竟至無訟先是樞密
副使姜遵嘗爲廬陵民德之至是有前姜後陳之誰移知資州
歷撫蜀蘄數州所至有惠政遷秘書監巽好學律數星象之技
無所不通

府志參
南豐集

程珣字伯溫舊名溫字君玉河南人慶歷初由黃陂尉調廬陵縣
尉端簡仁明接物以恕待人以誠尤持法不阿劉沆族人逋官

租數十萬前後官吏望風不敢問珣承檄主賦事追逮責盡償而後已或以告沆沆曰賦入不時吾家之罪縣官安可屈法珣至京沆延禮有加珣退謂人曰劉公偉量非他人能及真宰相也改大理寺丞知興國攝判南安軍時周敦頤爲司理不爲守所知珣視其氣貌非常與語果知道命二子顥頤師事之道學之傳實自此開焉

宋史伊川集獨醒雜志

陳汝器字適用南城人熙寧進士元豐初知廬陵黃庭堅稱其資性剛方剖斷無滯任法不避權勢牧民務去敗類摘奸發隱猾胥斂跡簿籍謹細如書生所鈇書以廬陵之難而稱治其賢司知

參通志

倪濤字巨濟廣德軍人試太學第一登大觀初進士調廬陵尉博學強記有操履入爲太學正歷左司員外郎以諫燕雲事件王

黜貶官卒 宋史宏簡錄

王昌成都華陽人岐公珪之後紹興五年知廬陵精於吏事勤強練密異時桀黠吏縛不能展手辨了公家事小大斬斬拊鰥寡餓唯恐未至又治黌舍新廟庭勸學養士政教並修士民服化祀名宦祠 胡銓學記

羅烈紹興十四年知縣事先是縣有文廟無學舍春秋莫有執爵踐庭行禮者會江少虞守吉州以爲闕典烈承命闢地爲講堂旁立二齋師長有位寓直有舍飲饌有庖祭器有庫始率諸生徒舍菜禮昕鼓旣聲諸生升堂列坐聽講退而就舍討課程藝閭閻秩秩絃誦之聲相聞也 柴紱學記

游少遊字希卿南豐人隆興進士攝永興令遷知廬陵縣皆有善政郡吏督賦語侵少遊叱曰剝民之政吾不忍爲命杖之又取

武斷者繩以法豪猾斂跡官至朝列大夫

明一統志

黃疇若字伯庸豐城人登淳熙進士授祁陽簿調柳州教授改靈川令會萬安軍黎蠻竊發經畧司選條畧招捕事宜謂須稽原始亂爲區處之方改知廬陵故事以六月督畸零稅疇若念民方艱食力不能支取任內俸錢三百緡代輸之諸司舉治績爲邑最召赴審察差監行在都進奏院應詔上三急務曰賦斂無藝都鄙無法守令無狀厯著作郎侍御史禮部尙書煥章閣學士致仕卒

宋史

趙汝厦宋宗室嘉泰初知廬陵縣嘗即縣庠立三忠祠祀歐陽文忠修楊忠襄邦父胡忠簡公時率諸生奉俎豆周必大記冷應澂字公定分寧人登寶慶進士調廬陵簿以廉能著楊長孺識拔之治獄平恕分時理務不擾不勸治官事如家事惜官物

如己物常曰方今國計內虛邊聲外震安得清譚自高以誤當
世至其臨事輒斷雖勢要不爲撓奪厯官至直寶章閣經畧廣
南東路後卒於家

宋史宏簡錄

龔日升字子輝南昌人嘉熙二年進士宰廬陵每聽訟必據經守
法不肯少委折以貳民聽凡所斷備書之冊踰年幾三帙名曰
帥正錄廬陵訟最繁自日升視事日以消殺

又天祥帥正錄序

黃端卿字正仲豐城人疇若子以蔭授官厯廬陵縣丞補茶陵時
賊起桂東高垓峒踰月破安福安仁又入楚掠未及城五里端
卿求援諸司未報勢急乃部分兵士遏截之明日率兵擊賊雨
暴至被賊執遇害事聞詔立廟賜額忠顯

何時字了翁撫州樂安人同文天祥登進士厯廬陵尉臨江司理
參軍改知興國縣辟署帥府機宜帶行間監文思院尋轉江西

通副督吉州鑲運元兵下吉州脫身歸鄉天祥開府南劍時起
兵趨興國復崇仁元軍奄至削髮竄迹嶺南賣卜自給號堅白
道人 宋史

舊按何時宋史有傳現從祀文山忠烈祠舊志闕傳秩官志
並軼其名因特采宋史補傳

元

熊朋來字與可富州人宋咸淳進士授寶慶僉判未任而宋亡元
初以薦爲廬陵教官所至講論經義考古篆籀文字調建安王
簿不赴晚以福清州判官致仕朋來之學深於三禮當時言禮
者咸宗之每歎詩樂無傳仿朱子所得趙彥肅家二十四譜增
二十詩俾皆可歌又補孔廟釋奠升歌樂章部伎者以之遍行
於諸郡學者稱爲天慵先生 通志

蕭渙字渙可元貞初爲廬陵教諭時學基窪狹廩餼匱竭渙拓其
基築高三尺建立心堂有僧以廣券估學田力辨復之劉辰翁記
秦思河間人延祐四年爲廬陵縣尹才識通敏與宣差不花同心
聽治修學校崇儒服行必遜謹治尙明決故邑雖劇而政聲大
著

馮克敏字彥達濮州臨清人延祐間由彭澤主簿遷廬陵縣丞修
舉廢陞督賦有方初縣治廢爲紋錦院機絡局而寄署於郡城
西五萬倉醫學又前直轄市適御史接部至以爲非宜乃別築
紋錦院而以其地徙醫學以醫學地建縣署三役並興悉克敏
董之克敏經畫調度吏無姦欺民不知有役揭侯斯亟稱其才

且賢云

揭侯斯記
參九江志

艾吾老永豐人延祐中爲廬陵教諭縮用贏給與縣尹秦思協力

修學高廣視舊倍之

貢奎記

管文通至正三年尹縣事臨事敏斷人言物誘不能動尤盡心儒學士林翕然宗之

韓家奴湖南人至正八年爲廬陵縣達魯噶齊公平廉靜性至孝俸祿所餘卽馳歸奉母尋以侍養解官去

寶童字惟善蒙古人至正十一年爲廬陵達魯噶齊不數月盜陷郡城寶童監守不屈集義士力戰殺賊甚衆廬陵復安十四年袁州城陷寶童援之以功陞廣東僉都元帥十一月與賊戰于石橋自辰至申甲士饑疲不任戰童與騎將瓚飛等八人同沒於陣

舊志參通志

吳師尹字莘樂永新人至正八年進士授永豐縣丞旣去民歌思之十五年復起爲廬陵丞時興修學廟監郡納速兒丁以師尹

專董其役師尹有學術善吟咏後進多師之稱桂岡先生

蕭飛鳳學

記參通志

馬致遠字合穆其先世自西域徙京師以陰補官授廬陵井岡巡檢至正壬辰江西盜起奉府檄捕南嶺備烏東致遠招集吉屬諸鄉鎮與賊鏖戰斬捕甚多上功幕府監郡納速兒丁多其能辟安成判官授廬陵監縣擢為東萬戶府事癸巳九月賊自永新踰嶺掠玉山火淡江將近安塘致遠率衆追擊破走之乙未破袁寇於安福丙申復破賊黨於永豐之羅興堂賊躍馬奮擊戟抵胃致遠斬以徇明日整兵復出生擒賊帥周昇又明日官軍四集焚其營巢拔良民之陷賊者慰撫之民相率立生祠於安塘

周霆震記

劉以輔東平人初為贛掾以廉能著聲調廬陵掾精白一心勤勞

朝夕事至立決如燭照數計造廷累千百無畱牘游刃恢恢恒

有餘地

周霆震記

明

吳明善字仲元舒城人吳二年知廬陵縣行能高備沈毅有大畧約已勤政奉法惟謹時兵燹之後曹署庫獄咸毀吏抱案牘寄署他所囚無所處至築置坊巷民家明善按舊規次第完繕復取文信國所題明德堂三大字揭於聽事之堂以示爲政標本云顏大奇記

王泰河南衛輝人洪武七年知廬陵縣才敏而勤迎事立決時開國之初前令未遑興學泰增修學宮鼓舞儒士令行政舉民安職業邑稱大治

府志參舊志

李景南洪武間爲廬陵主簿與知縣王泰同心共濟篤於學校勸

於佐理士民誦之 府志

劉灝山東武陽人舉賢良通籍洪武十三年知縣事精明果敢案無畱牘上下交稱其能後以事去邑人思之 舊志參府志

陸謙揚州江都人洪武十五年山賢良知廬陵縣平恕廉謹專務拊循士民懷之滿秩去老幼遮道泣送 同上

周召字公明吉水人性冲澹博學攻文洪武中以薦司訓廬陵英才蒙其教育皆底於有成召預纂修廷試大明一統賦稱旨擢第一著有溪園集卒時周忱爲制哀詞 通志參周忱序

聶鉉字器之清江人洪武進士爲廣宗丞疏旱災入覲授翰林待制改國子助教與同邑張美和同賜歸十八年復召典會試欲畱用之乞便地自養授廬陵教諭卒時稱成均三助教謂鉉與美和及嘉興貝瓊也 明史參臨江志

孔文英陝西慶陽人洪武二十八年由進士知廬陵縣廉介剛毅
官署所需一絲一粟不以累民察胥吏蠹民者盡法懲治事有
不便於民去之必力旋擢監察御史去民懷其惠

府志參舊志

周桀字仲方吉水人洪武鄉舉爲翰林侍從事必師古出爲中牟
令有異政遷台州同知謫於戎伍廬陵李昌祺自陳有志經學

願得桀爲師起爲廬陵司訓夏原吉薦同治水蘓松有聲

通志人物

朱幹鳳陽人建文元年知縣事姿性通明燭姦如神人無所行其
詐操守廉介一清如水人不取干以私事不畏難行之必果時

稱賢令

府志舊志合訂

張源字本深江陵人永樂五年知縣事治民先鋤強暴曰強暴不
去何由綏良善也凡學校橋梁驛舖以次修整署泰和縣事兩

邑人並尸祝之

府志

蔡然永樂初任永寧典史疏通水利資民灌溉自奉澹泊不枉一事不受一錢陞廬陵知縣邑人祀之

采永寧名宦補

董文宣德初爲廬陵教諭以學址隘規制弗備力請於上清復學旁三皇廟故基擴其地建明倫堂文昌閣闢學門鑿泮池繕禮殿治明德育才兩齋於是壯麗與郡學等

李昌祺學記

楊英隆慶州人天順初知廬陵縣時學宮圯隘弗治莫肯知府張瑄捐俸倡修與訓導王綱規方計畫厚值購學旁民地益學基葺舊增新復創會文堂觀德亭增號舍四十間學制至是大備

蕭維楨學記

費鎧寧波人成化末由進士知廬陵縣事明敏沈重剔除姦蠹不稍寬假平居喜怒未嘗或形於色胥吏莫窺其際治邑二載役畏民懷邑人久而思之

府志

夏穀鎮江金壇人宏治十一年由進士知縣事爲政寬平不尙苛
刻嘗曰嚴以御左右寬以盡下情但下多受賜毋吾畏也催科
不擾民輸賦恐後立社館遴俊秀子弟授以小學歌詩習禮躬
親教之會閭人橫凌郡縣來科細葛不予閭人知其素守寬仁
軍舍不人邑而去後厯官浙江參議奉命鞠獄江西疾卒

舊志
參一

志統

柳尙義巴陵人宏治進士十三年知廬陵縣事才識明敏善理煩
劇民強悍者畏其法善良者懷其惠征輸置一方冊勸民屆期
自輸嘗曰但使吾爲民受累勿令吾民爲役擾也其郊行詩云
斯民直道還三代長吏循良愧後生後擢御史去

府志

鄧鑾仁和人正德初出進士知廬陵縣事興學造士繕修黌舍始
立科甲題名碑於明倫堂又於螺子山忠烈祠建正氣亭礱石